




**Kamis, 18 Pebruari 2021**

*Ogen: Jeremia 48: 1-10*



**Dewa Ras Kebayaken La Ergegeh**



**B**angsa Moab lit arah kesusuren Lot ras anakna sintua. Anak e me iberekenna gelar Moab (bapa kerina kalak Moab). Daerah si ingani Bangsa Moab tuhu-tuhu mejile nai-nai nari bahkan i bas catatan sejarah ngasa genduari enda pe (gundari Tiberias). Ratusen dolmen, menhir, susunen batu melingkar. E maka bangsa Moab terberita mengandalken gegehna, kebakakenna bage pe kerina si lit i bas daerahna. Ban gegehna, kuasana, i bas penemuan arkeologis, Bangsa Moab pernah naluken Israel.

Tapi, la ngena ate Dibata kempak Moab, sebab ia ernalem kempak gegeh ras kebakakenna, isembahna dewa Kemos, la sitik pe itulihkanNa Dibata. I bas mentasi kegeluhen, megombang kal ia man bangsa Israel ras igombangina pe Dibata. E maka alu kuasa Tuhan, ikerneppenNa me kuta-kutana, benteng-benteng kemulianna. Suasana dem kecedan sebab anak-anak serko seh kesi-kesi, sora tangis gedang-gedang dalan. Nina Tuhan i bas rawana nandangi bangsa e “o Moab, ernalem kam kempak gegeh dengen kebakakenndu, genduari irebut me kam. La lit sada pe pulah, kerina iradasken” (bd. Ayat 7-8).

Kebayaken la ergegeh. Kebayaken labo kekal/ abadi/ labo rasa lalap. E maka i bas kegeluhenta selaku kalak si erkiniteken man Tuhan kerna si enda arus isedari kita. Payo, ulihta latih si ipasu-pasu Tuhan nambahi kinilitenta. Tapi, adi ernalem kita kempak kinilitenta, si bahna kebakaken e ulu geluhta, ulu keriahen ras ulu gegehna, merawa me Tuhan. Sebab e seri ertina ras mpedua-dua Tuhan i bas kegeluhenta. E maka sadarlah kita, kerina si lit i bas kegeluhenta enda Dibata kap si merekenca, Dibata kap si ngaturkenca. Ersura Dibata gelah arah pemereNa e kita la meganjang ukur, la menganggap dirinta enda me si hebatna, tapi segelah banci ka nampati nandangi kalak sideban. Kebayaken e labo Dibata, labo lit kuasana ngaturken kegeluhenta, labo banci itambahina umurta sada detik pe amin uga gia lalana ertanta. krbayaken e terjeng alat siibereken Dibata lako encukupikeperlun geluhta, jadi labo e jadi tujun. Sura-sura Dibata arah kebakaken e si pakeken guna nampati kalak sideban. Arah kebakaken e enterem kalak nggejapken pasu-pasu Dibata.